

Pa motibo cu no tin ningun sorto di coordinacion ni administracion adecuado

Juan Farro a retira for di PDA

ORANJESTAD(AAN) - Pa motibo cu no tin ningun sorto di coordinacion, ni administracion adecuado Juan Farro a dicidi di bandona PDA.

DIARIO a ricibi copia di e carta cu Juan Farro a manda pa presidente di PDA, Dr. L. Berlingi cual ta papia pa su mes.

"Como miembro di bestuur y partijraad, firmante ta acerca bo pa pone bo na altura di su retiro for di ambos cuerpo di PDA, despues di aclaracion di un ke otro.

Despues di reunion di dia 16 Januari 1989 tabata un vez mas un muestra cu e partido no tin ningun sorto di coordinacion, ni administracion adecuado, mi a propone pa instala un kascomissie, pa asina trece poco

claridad pa "at least" e parti financiero di PDA, pa asina e parti ey tin un base legal.

Henter e administracion financiero ta completamente abracadabra pa mi. Sumanan grandi tabata sali for di partijkas sin cu nunca mi por a experiencia un relato financiero.

Mi no a mira ningun recibo y ningun resultado di enquette teni pa "Analyses Group", pa cual sumanan grandi a worde paga.

Dia 26 di Januari 1989, bestuur y miembronan di partijraad lo a haya un "schriftelijke verantwoording" di e gastonan for di presidente y un relato financiero di tesoroero y e resultado di e enquette teni pa "Analyses Group" lo worde comparti cu e dos cuerponan

ya menciona di partido.

Pa falta di madures y etica politico di un of mas miembronan di partijraad c.q. bestuur, cierto problemanan den partijraad a sali publica, loke firmante ta desapropa categoricamente y ta lamenta esaki profundamente.

Pa kita tur duda cu por a surgi debi cu tin integrantenan di partido tin e creencia cu ta mi persona a comete e acto baho aki, mi kier a aclarea cu te cu awe, tur comunicado cu a sali for di mi persona semper tabata firma, cu adres y te hasta telefon.

E reunion dia 26 di Januari, den cual aclaracion lo worde duna, a trece unicamente mas confucion y desconfianza pa cu administracion financiero di

partido.

Di parti di presidente tabata tin un falta di respet completo pa e miembronan di e dos cuerponan y un falta di seriedad.

Vice presidente no a presenta na ningun di e reunionnan aki, y tesoroero cu mester a duna un relato financiero dia 26 Januari tampoco a presenta.

Recibonan y resultado di enquette no tabata tin. Cifranan cu presidente mes a suministra no tabata liber pa controla, ya cu ningun miembro presente no tabata tin mag di tene e relato di presidente den nan man.

Como comisario di bestuur mi ta urgi presidente pa:

1. Yama un reunion mas pronto cu ta posible;
2. Respet y seriedad pa e dos

cuerponan;

3. Forma un kascomissie;
4. Control financiero door di un accountant imparcial;
5. Relato di resultado di enquette di "Analyses Group";
6. Decision encunto continuation of desolvimento di PDA;

7. Si desolve partido, destina e restante di liquides di partido pa instantianan caritativo.

Terminando mi kier a propone pa presidente actua mas pronto cu ta posible, pa asina e casonan aki keda aclarea.

Proposicion: reunion prome cu 10 di Februari 1989.

Por ultimo mi kier a pone na conocemento di bestuur di un aviso general, cu pronto lo worde publica den tur medio di

Sigui lesa pag. 12

Segun Rudy Croes:

Lo mi defende e interesnan di Aruba

ORANJESTAD(AAN)- Sr. Rudy Croes, ayeramainta a haci su prome presentacion como parlamentario y den su discurso a bisa cu ta un honor inmenso pe di por ta den sala di Parlamento representando e digio y culto pueblo. Mas ainda e ta sumamente contento di ta para na e banda sosteniendo un gobierno nobo y realmente di e pueblo aki.

El a bisa cu por corda kico a pasa algun aña pasa, na momento cu Movimiento Electoral di Pueblo a gana e eleccion y asina a duna su ruman Betico (q.e.p.d.) un

oportunidad pa a bira e Promer Ministro Presidente. Segun sr. Croes ken mas cu su persona tabata tin mas derecho

cu ne luchando semper inmensamente perhudicando su salud y su familia. E tin sigur cu tur ta di acuerdo cu siguramente sr. Betico a merece e puesto ey.

Nada mas cu e biaha ey na 1985 materialismo a hunga un papel crucial y a causa cu M.E.P. a perde e mayoria absoluto, sr. Croes a sigui bisa. Pero ken ta duda cu 8 ta mas cu 7. Pesey segun sr. Croes su pregunta ta pakico sr. Betico Croes no a haya e oportunidad pa por lo menos a bira e

promer informador di Aruba, asina purba na forma un gobierno. Pakico mester a castige di un forma asina crucial.

Sr. Croes a sigui bisa cu tur hende ta pordona, pero no lubida. Y e pueblo a realiza cu berdaderamente ta M.E.P. ta nan partido y a pone nan back na e banda cu ta pertenece realmente na e pueblo aki den su totalidad.

Y como representante y politico hoben sr. Croes a bisa cu e ta priminti di defende e in-

teresan cu realmente ta di pueblo. Pesey a uza den e campaña e lema "Un futuro briyante pa un y tur", pasobra fuera di defende interesnan di e pueblo, lo haci un esfuerzo sobrehumano pa e gobierno aki si drecha y hisa nivel di bida di henter e pueblo, esey kier meen pa un y tur.

Na final sr. Croes a manda un palabra di pabien na tur e coleganan Parlamentario. El a manda un palabra di pabien tambe na e pueblo cu a pone nan zynan.

Cu 12 voto na favor y 9 contra
Felix Flanegin a ser eligi
Presidente di Staten
Booshi Wever Vice Presidente

ORANJESTAD (AAN) - Den un reunion extra ordinario di Staten ayera mainta Sr. Felix Flanegin a ser eligi como Presidente di Staten den e gubernacion nobo.

Cu 12 voto di coalicion MEP/ADN/PPA y 9 voto contra cu ta di AVP y P.P.N. Felix Flanegin y Booshi Wever a ser eligi como Presidente y Vice Presidente di Staten.

E reunion a ser dirigi pa Mr. Hector Gonzalez Presidente saliente.

Miembronan a gradici Hector Gonzales pa su bon trabao y e ordo y respet cu el a pone den Staten.

Alavez e miembronan a yama Felix y Booshi un bon bini y deseanan tur clase di exito den e tarea dificil cu nan lo bay ocupa.



ORANJESTAD(AAN) - Docentenan di un school di Polis na Limburg a recauda fondo pa asina haci un donacion na e residencia pa anciano "Ambiente Feliz".

Señor Bais, kende ta encarga cu e school di Polis na Aruba aña pasa a haci un bishita na Hulanda y durante combersacion e docentenan a haya sa cu e ta presidente di "Ambiente Feliz".

E representante di e school a duna di conoce cu ta un tradicion cu den temporada di Invierno nan ta tene un accion pa recauda fondo pa un residencia di anciano.

E docentenan a dicidi di tene un accion y a recauda 2745 Florin Hulandes cu ayera atardi a worde entrega.